



JUDICIAL SYSTEM MONITORING PROGRAMME
PROGRAMA MONITORIZASAUN BA SISTEMA JUDISIÁRIU

Sumáriu Kazu
Tribunál Distritál Baukau
Jullu 2022

Afirmasaun: Sumáriu Kazu tuir mai ne'e deskreve faktu sira no prosesu iha Tribunál tuir JSMP nia monitorizasaun independente, no deklarasaun ne'ebé parte sira fó iha Tribunál nia laran. Informasaun ne'e la reprezenta JSMP nia hanoin hanesan instituisaun ida.

JSMP kondena maka'as forma violénsia hotu-hotu, liuliu hasoru fetu no ema vulneravel. JSMP afirma la iha justifikasaun ba kualkér violénsia hasoru fetu.

A. Sumáriu prosesu julgamentu kazu iha Tribunál Distritál Baukau

1. Totál kazu ne'ebé JSMP monitoriza: 28

Artigu	Tipu Kazu	Númeru
Artigu 145 Kódigu Penál (KP) & artigu 2, 3, no 35 letra (b)no artigu 36 (LKVD)	Ofensa ba integridade física simples ho natureza violénsia doméstika (artigu 2 kona-ba konseitu violénsia doméstika, artigu 3 kona-ba relasaun família, artigu 35 kona-ba tipu krime Violénsia Doméstika (VD) sira no artigu 36 kona-ba krime sira violénsia doméstika nian hanesan krime públiku)	16
Artigu 154 KP & artigu 2, 3, no 35 letra (a) LKVD	Maus-tratus ba kónjuje	1
Artigu 20 (1) Lei Arma Brankas	Arma Brankas	2
Artigu 145 KP	Ofensa ba integridade física simples	3
Artigu 157 KP, artigu 145 KP no artigu 20 (1) Lei Arma Brankas	Ameasa, maus-tratus ba kónjuje	1
Artigu 177 KP no artigu 182 KP	Abuzu seksuál ba menór ho agravaun	1
Artigu 140 KP	Omisídiu negligente	2

Artigu 140 KP no 207 KP	Omisídiu negligente no kondusaun sein karta	2
Totál		28

2. Totál desizaun ne'ebé JSMP monitoriza: 21

Tipu desizaun	Artigu	Númeru
Pena prizaun	Artigu 66	1
Suspensaun ba prizaun nia ezekusaun	Artigu 68 KP	6
Pena multa	Artigu 67 KP	10
Pena suspensaun no omologa	Artigu 68 KP no 216 KPP	1
Pena admoestasaun	Artigu 82 KP	1
Omologa	Artigu 216 KPP	2
Totál		21

3. Totál kazu sira ne'ebé adia tuir JSMP nia monitorizasaun: 0

4. Totál kazu ne'ebé sei kontinua prosesu tuir JSMP nia monitorizasaun:7

B. Deskrisaun sumáriu julgamentu ba desizaun kazu sira

1. Krime ofensa ba integridade fíizka simples ho natureza violénsia doméstika

Nú. Prosesu : 0006/21.BCBQI
 Kompozisaun Tribunál : Singulár
 Juis : Dra. Sribuana da Costa
 Prokuradór : Dr. João Marques
 Defeza : Dr. Grigório Maria Lourdes de Lima
 Desizaun : Pena prizaun fulan 2 suspende ba tinan 1

Iha 01 Jullu 2022, Tribunál Distritál Baukau prezide julgamentu leitura sentensa ba kazu ofensa integridade fizika simples ho natureza violénsia doméstika ne'ebé envolve arguidu MDR hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 11 Agostu 2021 iha oras tuku 19:00 kalan, lezada tein hela hahan iha dapur derepente arguidu mai ho kondisaun lanu lori kedas ho nu'u kelen ida hodi baku dala ida iha lezada nia ain parte karuk, baku dala ida iha lezada nia ain parte loos, baku dala ida iha kabun no baku dala ida iha lezada nia kidun.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál too tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu mós deklarata katak halo agresan hasoru lezada, tanba iha momentu ne'eba sira halo rate arguidu hemu tua no lanu ona, nune'e arguidu dehan ba lezada atu sira fila hamutuk, maibé lezada fila uluk tiha no arguidu fila ikus, nune'e bainhira to'o iha uma arguidu komete aktu hirak ne'e hasoru lezada. Arguidu mós hututan liután katak depoisde akontesementu ne'e sira di'ak malu kedas, arrepende ona nia hahalok no foin primeiravés mai hatan iha tribunál.

Alende ne'e lezada kontinua konfirma faktu hotu iha akuzasaun no deklarata katak depoisde akontesementu ne'e di'ak malu ona ho arguidu no to'o agora arguidu la baku ona lezada.

Alegasaun finál

Prokuradór haktuir katak arguidu provadu komete krime hasoru lezada, bazeia ba konfisaun arguidu nian no konfirma mós husi lezada, mezmua sira di'ak malu ona, husu ba tribunál atu fó pena ne'ebé prevene arguidu la repete hikas ninia hahalok ne'e iha futuru no eduka mós komidade ne'ebé besik arguidu. Ho nune'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu kondena arguidu ho pena ne'ebé edekuada ho konsiderasaun sira katak, arguidu konfesa arrepende nia hahalok, diak malu ona no lezada no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu mai ho kondisaun lanu lori kedas ho nu'u kelen ida hodi baku dala ida iha lezada nia ain parte karuk, baku dala ida iha lezada nia ain parte loos, baku dala ida iha kabun no baku dala ida iha lezada nia kidun.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu konfesa, arrepende ninia hahalok, diak malu ona ho lezada no foin primeiravés mai hatan iha tribunál, nune'e tribunál konklui prosesu ne'e kondena arguidu ho pena prizaun fulan rua suspende ba tinan ida

2. Krime ofensa ba integridade fízika simples

Nú. Prosesu	: 0053/18. BCBCV
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento

Desizaun : Omologa pedidu dezisténsia keixa

Iha 04 Jullu 2022, Tribunál Distrital Baukau prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Manuel Freitas Piedade hasoru lezadu Jaime Joao da Costa, iha Suku Wailili Postu Administrativu Baukau Vila, Munisípiu Baukau.

Akuzasaun prokuradór

Prokuradór akuza katak iha 01 Janeiru 2022, iha oras tuku 16:00 lokraik lezadu kondus motor Mio Beat husi diresaun Triloka atu ba Venilale bainhira to'o iha kruzamenta Igreja Wailili nia oin, arguidu hapara lezadu hodi tuku dala ida iha lezadu nia inus.

Prokurador akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaun, nune'e antes tama ba julgamentu produsaun ba prova, juis husu atu halo tentativa konsiliaun ba arguidu no lezadu.

Iha prosesu tentativa konsiliaun ne'e, lezadu hakarak dezisté sira ninia keixa hasoru arguidu, tanba arguidu ho lezadu mesak joven de'it. Alende ne'e arguidu mós konkorda ho lezadu nia pedidu ne'e no ho vontade rasik fó osan US\$100.00 ba lezadu hodi kura lezadu nia kanek no arguidu mós husu diskulpa ba lezadu, arrepende ona nia hahalok no konsidera hahalok ne'ebé arguidu komete hasoru lezadu ne'e ladi'ak no promete sei la komete tan hahalok hanesan iha futuru.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, nune'e tribunál konklui prosesu ne'e no omologa akordu ne'e.

3. Krime ofensa ba integridade fízika simples

Nú. Prosesu	: 0014/21. VQWTL
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Julio da Silva Correia
Defeza	: Dr. Grigório Maria Lourdes de Lima
Desizaun	: Omologa pedidu dezisténsia keixa

Iha 12 Jullu 2022, Tribunál Distritál Baukau prezide julgamentu tentativa konsiliaun ba krime ofensa ba integridade fízika simples ne'ebé envolve arguidu Marcelino de Almeida

no Adelino Guterres Soares hasoru lezadu Julio do Rosario, iha Suku Matahoi, Postu Administrativu Uatulari, Munisípiu Vikeke.

Akuzasaun prokuradór

Prokuradór akuza katak iha 13 Marsu 2021, iha oras tuku 10:00 dadeer, lezadu Julio do Rosario hamutuk ho nia maluk na'in rua iha hela natar laran, kondus tratór hodi halai natar, derepente Sr. Adelino Guterees no arguidu Marcelino de Almeida mosu mai hapara sira. Ho nune'e arguidu sira ho lezadu diskute malu arguidu Adelino Guterres Soares lori taktor sama lezadu nia ain fuan boot parte karuk no arguidu Marcelino de Almeida tuku dala ida iha lezadu nia matan laran parte karuk.

Prokuradór akuza arguidu nain rua kontra artigu 145 KP kona-ba ofensa ba integridade fizika simples ho moldura penál to'o tinan 3 ka multa.

Produsaun ba prova sira

Bazeia ba artigu 262 Kódigu Prosesu Penál (KPP) kona-ba tentativa ba konsiliaisaun, nune'e antes tama ba julgamentu produsaun ba prova, juis husu atu halo tentativa konsiliaisaun ba arguidu sira no lezadu.

Iha prosesu tentativa konsiliaisaun ne'e, lezadu hakarak dezisté ninia keixa hasoru arguidu sira, arguidu sira mós husu diskulpa ba lezadu, arrepende ona sira nia hahalok no konsidera hahalok ne'ebé arguidu sira komete hasoru lezadu ne'e ladi'ak no promete sei la komete tan hahalok hanesan iha futuru.

Alegasaun finál

Prokuradór no defeza apresia akordu dame ne'ebé parte rua decide ona no husu ba tribunál atu omologa prosesu ne'e.

Desizaun

Bazeia ba akordu dame husi parte rua no pedidu dezisténsia husi lezadu, nune'e tribunál konklui prosesu ne'e no omologa akordu ne'e.

4. Krime ofensa ba integridade fízika simples ho natureza violénsia doméstika

Nú. Prosesu	: 0028/22. BCBCV
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmiento
Desizaun	: Pena admoestasaun

Iha 12 Jullu 2022, Tribunál Distrital Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu PJdC hasoru nia oan hakiak, iha Munisípiu Baukau.

Akuzasaun Prokuradór

Prokuradóra akuza katak iha 18 Feveiru 2022, iha oras tuku 11:00 dadeer, arguidu basa dala ida iha lezada nia kanuruk. Antes agresaun ne'e, arguidu ho lezada diskute malu kona-ba bainhira arguidu fila husi to'os hamlaha atu han, maibé hahan laiha. Ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu mós deklarata katak depoisde akontesementu ne'e sira di'ak malu ona, arrepende ona ninia hahalok, foin primeiravés mai hatan iha tribunál no arguidu nu'udar agrikultór rezultadu hodi sustenta de'it ba família.

Alende ne'e, lezada mós konfirma faktu hotu iha akuzasaun no deklarata katak depoisde akontesementu sira di'ak malu ona no to'o agora la baku ona lezada.

Alegasaun finál

Prokuradór haktuir katak arguidu provadu komete krime ofensa ba integridade física simples ho natureza violénsia doméstika, bazeia ba konfisaun arguidu nian no konfirma mós husi lezada, mezmu sira di'ak malu ona maibé nafatin halo prevensaun atu arguidu la repete ninia hahalok ne'e iha futuru. Nune'e husu ba tribunál atu kondena arguidu ho pena multa.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun, arguidu konfesa, arrepende ona nia hahalok, foin primeiravés mai hatan iha tribunál no diak malu ona ho lezada.

Desizaun

Depoisde avalia faktu hotu, tribunál prova katak arguidu arguidu basa dala ida iha lezada nia kanuruk.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende ona ninia hahalok, foin primeravés mai hatan iha tribunál nune'e tribunál konklui prosesu ne'e kondena arguidu ho pena admoestasaun.

5. Krime ameasa, maus-tratus ba kónjuje no arma brankas

Nú. Prosesu	: 0007/20. BCBCV
Kompozisaun Tribunál	: Koletivu
Juis	: Dr. José António d. Escurial no Dra. Florencia Freitas, Dra. Sribuana da Costa
Prokuradór	: Dr. Julio da Silva Correia

Defeza : Dr. Grigório Maria Lourdes de Lima
Desizaun : Pena prizaun tinan 3 suspende ba tinan 3

Iha 13 Jullu 2022, Tribunál Distritál Baukau prezide julgamentu leitura akordaun ba krime ameasa, maus-tratus ba kónjuje no arma brankas ne'ebé envolve arguidu AMT hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 09 Maiu 2018, iha oras tuku 13:00 meiodia, arguidu tebe dala ida iha lezada nia kotuk laran rezulta lezada monu ba rai no arguidu foti fatuk kontinua tuku dala ida iha lezada nia kotuk laran. Kazu ne'e akontese sein motivu ne'ebé klaru no iha akontesimentu ne'e lezada gravida hela fulan hitu.

Tuir mai iha 28 Janeiro 2020, iha oras tuku 12:0 meiodia, lezada fila husi merkadu haree viziñu nia bibi tama lezada nia to'os laran nune'e lezada hirus, ho nune'e lezada diskute malu ho viziñu, bainhira haree lezada diskute malu hela ho viziñu, arguidu hirus hodi tuda dala haat ba lezada maibé la kona, arguidu kontinua tuda tan lezada hodi kona iha lezada nia kotuk laran no rezulta lezada monu ba rai, la to'o iha ne'e de'it arguidu kontinua foti katana ameasa atu oho lezada, nune'e lezada halai tiha.

Prokuradór akuza arguidu kontra artigu 157 KP kona ba krime ameasa ho nia moldura penál to'o tinan 1 ka multa, 154 KP kona-ba maus-tratus ba konjuje ho nia moldura penál tinan 2 to'o tinan 6 konjuga ho artigu 20 (1) Lei Arma Brankas.

Produsaun ba prova sira

Antes tama ba produsaun ba prova, bazeia ba artigu 262 KPP kona-ba tentativa konsiliaun, tribunál halo tentativa konsiliaun ba arguidu no lezada relasiona ho krime ameasa tanba kazu ne'e klasifika nu'udar krime semi-públiku no nia prosedimentu depende ba keixa. Iha prosesu konsiliaun ne'e, arguidu ho lezada deklara katak antes ne'e sira rezolve ona problema ne'e tuir tradisaun Timor nian. Ho nune'e, lezada hakarak deziste tiha nia keixa hasoru arguidu relasiona ho krime ameasa ne'e. Bazeia ba konkordánsia husi parte rua ne'e, tribunál omologa tiha krime ameasa ne'e. Entretantu ba krime maus-tratus ba kónjuje no arma brankas, tribunál kontinua ba prosesu julgamentu.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, depoisde akontesimentu diak malu kedas ho lezada. Arguidu ho lezada forma família dezde tinan 2006 iha oan nain haat foin primeiravés baku lezada. Arguidu mós deklara katak arrepende ona ninia hahalok, promete iha futuru sei la baku tan lezada no arguidu nu'udar funsionariu Saneamentu ho vensimentu kada fulan US\$115.00.

Alende ne'e, lezada mós kontinua konfirma faktu hotu iha akuzasaun no deklara katak depoisde akontesimentu ne'e lezada ba halo tratamentu iha Pradet Baukau no depoisde fila husi Pradet sira diak malu kedas.

Alegasaun finál

Prokuradór haktuir katak arguidu provadu halo agresaun kruel hasoru lezada nu'udar nia feen, arguidu nu'udar la'en tuir loloos proteze lezada, maibé pelu kontrariu arguidu mak komete fali krime hasoru lezada, mezmu sira di'ak malu ona maibé atu prevene arguidu repete ninia hahalok ne'e hasoru membru familía ka ema seluk iha futuru. Nune'e husu ba tribunál atu kondena arguidu ho pena prizaun tinan tolu suspende ba tinan tolu.

Entretantu, defeza haktuir katak arguidu konfesa faktu hotu iha akuzasaun, arrepende ninia hahalok, di'ak malu ona ho lezada no foin primeiravés mai hatan iha tribunál. Nune'e husu ba tribunál aplika pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tebe dala ida iha lezada nia kotuk laran rezulta lezada monu ba rai no arguidu foti fatuk kontinua tuku dala ida iha lezada nia kotuk laran arguidu hirus hodi tuda dala haat ba lezada maibé la kona, arguidu kontinua tuda tan lezada hodi kona iha lezada nia kotuk laran no rezulta lezada monu ba rai, la to'o iha ne'e de'it arguidu kontinua foti katana ameasa atu oho lezada, nune'e lezada halai tiha.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeravés mai hatan iha tribunál, nune'e tribunál konklui prosesu ne'e kondena arguidu ho pena prizaun tinan tolu suspende ba tinan tolu.

6. Krime ofensa ba integridade fízika simples ho natureza violénsia doméstika

Nú. Prosesu	: 0054/21.BCSIC
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Julio da Silva Correia
Defeza	: Dr. Sidonio Maria Sarmiento
Desizaun	: Pena multa US\$45.00

Iha 13 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu HBG hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 20 Dezembru 2021 iha oras tuku 11:58 dadeer, arguidu basa dala ida iha lezada nia hasan parte karuk no tebe dala ida iha lezada nia kabun sorin rezulta lezada monu ba rai no lezada nia ulun baku ba simenti. Antes agresaun ne'e, arguidu ho lezada diskute malu kona-ba lezada husu ba arguidu relasiona ho número telefone foun ne'ebé tama ba arguidu nia telemovel, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun, arguidu mós deklarata katak. Depoizde akontese di'ak malu kedas no kontinua moris hamutuk nu'udar feen ho la'en, arrepende nia hahalok, foin primeiravés mai hatan iha tribunál, arguidu serbisu nu'udar agrikultór rezultadu hodi sustenta de'it ba família.

Alende ne'e lezada kontinua konfirma faktu hotu iha akuzasaun no konfirma mós katak depoizde akontesimentu ne'e di'ak malu ona ho arguidu.

Alegasaun finál

Prokuradór konsidera arguidu provadu komete krime hasoru lezada, bazeia ba konfisaun arguidu nian no konfirma mós husi lezada, mezmuni nune'e atu prevene krime hanesan akontese tan iha futuru, husu ba tribunál atu kondena arguidu ho pena prizaun fulan neen suspende ba tinan ida.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak arguidu konfesa, arrepende nia hahalok no di'ak malu ona ho lezada no foin primeiravés mai hatan iha tribunál.

Desizaun

Depoizde avalia faktu hotu, tribunál prova katak arguidu basa dala ida iha lezada nia hasan parte karuk no tebe dala ida iha lezada nia kabun sorin rezulta lezada monu ba rai no lezada nia ulun baku ba simentu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loraun durante loraun 90. Tribunál mós fiksa pena alternativa durante loraun 60 prizaun, bainhira arguidu la kumpri pena multa refere.

7. Krime ofensa ba integridade fízika simples ho natureza violénsia doméstika no ameasa

Nú. Prosesu	: 0001/22.MNLCL
Kompozisaun Tribunál	: Singulár
Juis	: Dr. Florencia Freitas
Prokuradór	: Dr. Julio da Silva Correia
Defeza	: Dr. Grigório Maria Lourdes de Lima
Desizaun	: Pena prizaun fulan 2 suspende ba tinan 2

Iha 14 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika no ameasa ne'ebé envolve arguidu FS hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 24 Janeiru 2022, iha oras tuku 10:00 dadeer, arguidu buti lezada nia kakorok, rasta lezada nia liman no dudu monu lezada ba rai, arguidu mós dehan ba lezada nune'e "*sorte imi nian se lae hau sona mate hotu imi.*" Kazu ne'e akontese bainhira arguidu fila ba uma ho kondisaun lanu lezada husu tuir, nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho moldura penál to'o tinan 3 ka multa, konjuga ho artigu 2, 3(a), 35(b) no 36 LKVD no artigu 157 KP kona ba ameasa ho moldura penal tinan 1 ka multa.

Produsaun ba prova sira

Iha prosesu julgamentu, arguidu deklara katak iha akontesimentu ne'e arguidu ho kondisaun lanu, lezada haruka arguidu atu ba tunu ikan iha baraka hodi faan, ho nune'e aguidu ho lezada diskute malu arguidu buti lezada nia kakorok, maibé la rasta lezada nia liman no la ameasa lezada. Arguidu mós deklara katak depoisde akontesimentu ne'e seidak di'ak malu to'o agora, foin primeiravés mai hatan iha tribunál no promete sei la komete tan krime seluk iha futuru. Arguidu nu'udar agrikultór rezultadu hodi sustenta de'it ba família.

Iha parte seluk lezada kontinua konfirma faktu hotu iha akuzasaun kona ba ameasa lezada sente tauk maibé nafatin ba haree sira nia oan ne'ebé hela ho arguidu. Lezada deklara liután katak depoisde akontesimentu ne'e to'o agora sira seidak di'ak malu.

Alegasaun finál

Prokuradór konsidera arguidu provadu komete krime hasoru lezada, mezmú arguidu nega faktu balun iha akuzasaun, maibé lezada konfirma no to'o agora sira seidak di'ak malu. Tanba ne'e husu ba tribunal aplika pena prizaun tinan rua suspende ba tinan rua.

Entretantu, defeza haktuir katak arguidu deklara deit faktu ne'ebé nia komete, arrepende ona nia hahalok, nune'e husu ba tribunál ba kazu ofensa ba integridade fízika simples kondena arguidu ho pena kmaan, enkuantu ba krime ameasa husu ba tribunál atu absolve arguidu husi krime ne'e.

Desizaun

Depoisde avalia faktu hotu, tribunál prova katak arguidu buti lezada nia kakorok, rasta lezada nia liman no dudu monu lezada ba rai no ameasa mós lezada.

Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende ona ninia hahalok, nune'e tribunál konklui prosesu ne'e kondena arguidu ho pena prizaun fulan rua suspenbe ba tinan ida.

8. Krime ofensa ba integridade fízika simples ho natureza violénsia doméstika

Nú. Prosesu : 0035/21. VQOSU
Kompozisaun Tribunál : Singulár
Juis : Dra. Florencia Freitas
Prokuradór : Dr. Bartolomeu de Araújo
Defeza : Dr. Grigorio de Lima
Desizaun : Pena multa US\$45.00

Iha 18 Jullu 2022, Tribunál Distrital Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu LGP hasoru nia feen, iha Munisípiu Vikeke.

Akuzasaun Prokuradór

Prokuradór akuza katak iha 18 Jullu 202, iha oras tuku 17:30 loraik, arguidu tuku dala ida iha lezada nia ulun, tebe dala ida iha lezada nia kanotak no buti lezada nia kakorok. Antes agresaun ne'e arguidu ho lezada diskute malu kona-ba bainhira lezada ho sira nia oan nain rua ba misa no fila husi misa labarik sae motor ho sira ninia avo arguidu sente preokupadu uituan, nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu ne'ebé imputa ba nia, depoisde akontesementu ne'e sira di'ak malu ona, arrepende ona sira ninia hahalok to'o agora la baku ona lezada, iha oan na'in rua no foin primeiravés halo agresaun hasoru lezada.

Alende ne'e, lezada kontinua konfirma faktu hotu iha akuzasaun no konfirma mós ho arguidu nia deklarasaun katak sira di'ak malu ona no to'o agora arguidu la halo ona agresaun hasoru lezada.

Alegasaun finál

Prokuradór haktuir katak mezmu sira di'ak malu ona no moris hamutuk nafatin hanesan feen-la'en, maibé atu halo prevensaun ba arguidu atu la hatoman-an uza violénsia hasoru lezada no oan sira iha futuro, husu ba tribunál atu aplika pena prizaun fulan ida suspende ba tinan ida.

Enkuantu defeza haktuir katak arguidu konfesa faktu hotu iha akuzasaun, di'ak malu ona, arrepende ninia hahalok, foin primeiravés halo agresaun hasoru lezada, nune'e husu ba tribunál fó pena ne'ebé adekuadu ba arguidu.

Desizaun

Depoisde avalia faktu hotu, tribunál prova katak arguidu tuku dala ida iha lezada nia ulun, tebe dala ida iha lezada nia kanotak no buti lezada nia kakorok.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

9. Krime ofensa ba integridade fízika simples ho natureza violénsia doméstika

Nú. Prosesu : 0127/21.BCBCV
Kompozisaun Tribunál : Singular
Juis : Dr. Jose Escurial
Prokuradór : Dr. Bartolomeu de Araujo
Defeza : Dr. Americo Luis Freitas Belo
Desizaun : Pena multa US\$30.00

Iha 19 Julu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu IdS hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 03 Dezembru 2021, iha oras tuku 09:00 dadeer, arguidu nia tiun husu rai henek, maibé lezada lakohi fó, nune'e arguidu lori kadeira masa baku dala barak iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak nia tiun husu rai henek balde neen atu hadia nia uma, maibé lezada lakohi fó ne'e mak arguidu hirus foti kadeira masa baku dala rua iha lezada nia kotuk laran, depoisde akontese lezada ho sira nia oan nain rua ba hela iha lezada nia inan aman nia uma no la fila fali ba sira nia uma to'o agora. Arguidu deklara liután katak arrepende ona ninia hahalok, foin primeiraves mai hatan iha tribunál, arguidu nu'udar motorista ba kareta vaskolante ho vensimentu kada fulan US\$180.00.

Alende ne'e lezada mós konfirma faktu hotu iha akuzasaun no deklara mós katak depoisde akontesimentu ne'e lezada ho oan nain rua ba hela ho nia inan aman to'o agora. Lezada deklara tan katak antes ne'e arguidu sempre baku hela deit lezada maibé lezada la apresenta keixa.

Alegasaun finál

Prokuradór haktuir katak arguidu provadu komete krime ne'ebe imputa ba nia no arguidu nia konduta ne'e halo lezada hases-an husi arguidu tanba antes ne'e arguidu sempre halo agresan hasoru lezada maibé lezada la hato'o keixa. Tanba ne'e husu ba tribunál atu kondena arguidu ho pena prizaun fulan ida suspende ba tinan ida.

Entretantu defeza haktuir katak arguidu konfesa faktu ne'ebé imputa ba nia, arrepende ona ninia hahalok foin primeiravés mai hatan iha tribunál. Tanba ne'e husu ba tribunál atu aplika pena admoestasaun ba arguidu.

Desizaun

Depoisde avalia faktu hotu, tribunál prova katak arguidu lori kadeira masa baku dala barak iha lezada nia kotuk laran.

Bazeia ba faktu provadu sira ne'e no tetu mós ho sirkunstánsia atenuante sira hanesan arguidu arrepende ninia hahalok, foin primeravés mai hatan iha tribunál, sira moris separa ona nune'e tribunál konklui prosesu ne'e kondena arguidu ho pena multa US\$30.00 ne'ebé arguidu sei selu US\$1.00 kada loran durante loran 30. Tribunál mós fiksa pena alternativa durante loran 40 prizaun, bainhira arguidu la kumpri pena multa refere no selu taxa justisa US\$20.00.

10. Krime ofensa ba integridade fízika simples ho natureza violénsia doméstika

Nú. Prosesu	: 0075/21. BCBCV
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento
Desizaun	: Pena prizaun tinan 1 suspende ba tinan 3

Iha 19 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu CdSH hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 01 Agostu 2021, iha oras tuku 10:00 dadeer, lezada husu osan atu sosa sira nia oan nia nesesidade arguidu kaer lezada nia ain riba ba rai no kontinua tebe no tuku dala barak iha lezada nia kotuk laran. Lezada halai arguidu duni tuir toman lezada no kontinua kaer lezada nia liman no riba lezada ba rai tuku dala ida iha lezada nia kotuk laran.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak basa deit dala ida iha lezada nia hasan, enkuantu faktu seluk arguidu la komete. Depoisde akontese lezada ho oan nain rua ba hela fali ona iha Dili no sira moris separa ona. Arguidu antes mai hatan ona tribunál ho krime hanesan hasoru lezada no tribunál kondena arguidu ho pena multa US\$15.00, arguidu nu'udar karpinteiru vensimentu kada fulan US\$120.00.

Entretantu lezada konfirma faktu hotu iha akuzasaun, antes sira moris separa arguidu hola tan feto seluk no arguidu deklara katak prontu responsabiliza ba feen nain rua, tanba ne'e mak lezada simu feen sigundu hodi moris hamutuk iha uma ida toba fahe kuartu de'it. Depoisde akontesimentu ikus ne'e lezada diside moris separa ona husi arguidu to'o agora.

Alegasaun finál

Prokuradór haktuir katak mezmu arguidu konfesa parsial, maibé lezada konfirma akuzasaun sein rezerva no antes ne'e arguidu komete ona krime hanesan hasoru lezada, nune'e prokuradór konsidera arguidu la arrepende ninia hahalok, tanba ne'e husu ba tribunál atu kondena arguidu ho pena prizaun tinan ida suspende ba tinan ida.

Entretantu, defeza haktuir katak arguidu deklara deit faktu ne'ebé nia komete, arguidu ho lezada iha oan nain rua ne'ebé sei presija arguidu nia responsabilidade, tanba ne'e husu ba tribunál aplika pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu kaer lezada nia ain riba ba rai no kontinua tebe no tuku dala barak iha lezada nia kotuk laran. Lezada halai arguidu duni tuir toman lezada no kontinua kaer lezada nia liman no riba lezada ba rai tuku dala ida iha lezada nia kotuk laran.

Bazeia ba faktu provadu sira ne'e tribunál konklui prosesu ne'e no kondena arguidu ho pena prizaun tinan ida suspende ba tinan tolu.

11. Krime ofensa ba integridade fízika simples

Nú. Prosesu	: 0015/21. BCVMS
Kompozisaun tribunál	: Singulár
Juis	: Dr. Dr. José António d. Escurial
Prokuradór	: Dr. Ambrosio Rangel Freitas
Defeza	: Dr. Sidonio Maria Sarmiento
Desizaun	: Pena multa US\$15.00

Iha 20 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ne'ebé envolve arguida Eliza Freitas Monteiro hasoru lezada nia kuñada Ediana Ines Freitas, iha Suku Vemasse, Postu Administrativu Vemasse, Munisípiu Baukau.

Akuzasaun Prokuradór

Prokuradór akuza katak iha 21 Novembru 2021, iha oras tuku 16:18 lokraik, arguida ba lezada nia uma hodi husu nia la'en, maibé lezada hatan katak hau la hatene, ho nune'e arguida foti fatuk tuda lezada no kona iha lezada nia reen-toos rezulta kanek ki'ik.

Prokuradór akuza arguida kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa.

Produsaun ba prova sira

Iha prosesu julgamentu, arguida konfesa faktu hotu iha akuzasaun, depoisde akontesementu ne'e arguida ho nia oan menór fila ba nia inan aman iha Ossu, arrepende ninia hahalok, foin primeiravés mai hatan iha tribunál no arguida nu'udar agrikultór rezultadu sustenta de'it ba nia oan.

Alende ne'e, lezada mós kontinua konfirma faktu sira iha akuzasaun no deklara katak depoisde akontesementu ne'e arguida ba hela tiha iha nia inan aman la fila to'o agora.

Alegasaun finál

Prokuradór haktuir katak arguida provadu komete krime ne'ebé imputa ba lezada bazeia ba konfisaun arguida nian no konfirma mós husi lezada, kazu ne'e simples haree ba arguida nia konduta to'o agora arguida ho nia la'en moris separa. Razaun hirak ne'e husu ba tribunál atu kondena arguidu ho pena prizaun fulan tolu suspende ba tinan ida.

Entretantu defeza husu ba tribunál atu aplika pena ne'ebé kmaan liu ba arguida, bazeia ba prova ne'ebé produs ona iha audiénsia julgamentu, arrepende ninia hahalok, foin primeiravés mai hatan iha tribunál no kooperera di'ak ho justisa.

Desizaun

Depoisde avalia faktu hotu, tribunál prova katak arguida foti fatuk tuda lezada no kona iha lezada nia reen-toos rezulta kanek ki'ik.

Bazeia ba faktu provadu sira ne'e no tetu mós sirkunstánsia atenuante sira hanesan arguida konfesa, arrepende nia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguida ho pena multa US\$15.00 ne'ebé arguida sei selu 0,50 sentavus kada lora durante lora 30. Tribunál mós fiksa pena alternativa durante lora 20 prizaun, bainhira arguida la kumpri pena multa refere.

12. Krime ofensa ba integridade física simples ho natureza violénsia doméstika

Nú. Prosesu	: 0006/21. VQVQQ
Kompozisaun Tribunál	: Singulár
Juis	: Dr. Dr. José António d. Escurial
Prokuradór	: Dr. Julio da Silva Correia
Defeza	: Dr. Sidonio Maria sarmento
Desizaun	: Pena multa US\$30.00

Iha 25 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JMP hasoru nia subriña, iha Munisípiu Vikeke.

Akuzasaun Prokuradór

Prokuradór akuza katak iha 01 Feveireiru 2021, iha oraas tuku 11:00 dadeer, lezada moras toba hela iha uma laran arguidu lori bé fakar iha lezada nia leten, arguidu mós foti masa jerigen litru lima nian hodi baku dala ida iha lezada nia ulun.

Iha 02 Feveireiru 2021, lezada telefone ba nia inan hodi informa katak arguidu fakar be iha lezada nia leten, arguidu rona basa dala ida lezada nia hasan.

Prokuradór akuza arguidu kontra artigu 145 KP kona-ba ofensa ba integridade física simples ho nia moldura penál to'o tinan 3 ka multa konjuga ho artigu 2, 3, 35 no 36 LKVD.

Produsaun ba prova sira

Iha prosesu julgamentu, arguidu deklara katak faktu no motivasaun problema ne'e loos hotu, arguidu nu'udar lezada nia tiun, lezada dezde 2019 hela ho arguidu mak eskola to'o agora, depoisde akontese sira di'ak malu fali ona, arrepende ninia hahalok, foin primeiravés mai hatan iha tribunál, serbisu nu'udar mekaniku ho rendimentu kada fulan maizumenus US\$200.00

Alende ne'e, lezada mós konfirma faktu hotu iha akuzasaun no deklara katak deposite akontesimentu ne'e diak malu ona ho arguidu no agora dadaun nafatin hela hamutuk ho arguidu.

Alegasaun finál

Prokuradór haktuir katak arguidu provadu komete krime rua hasoru lezada no mezmu sira di'ak malu ona maibé atu prevene arguidu repete tan nia hahalok ne'e iha futuro, husu ba tribunál atu kondena arguidu ho pena prizaun tinan ida suspende ba tinan ida.

Entretantu defeza husu ba tribunál atu kondena arguidu ho pena ne'ebé kmaan ho konsiderasaun katak, arguidu konfesa, arrepende nia hahalok no foin primeiravés mai hatan iha tribunál.

Desizaun

Depoisde avalia faktu hotu, tribunál prova katak arguidu lori bé fakar iha lezada nia leten, arguidu mós foti masa jerigen litru lima nian hodi baku dala ida iha lezada nia ulun, iha loron tuir mai arguidu basa dala ida iha lezada nia hasan.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende nia hahalok, foin primeiravés mai hatan iha tribunál, nune'e

tribunál konklui prosesu ne'e no kondena arguidu ho pena multa US\$30.00 ne'ebé arguidu sei selu 0,50 sentavus kada loron durante loron 60. Tribunál mós fiksa pena alternativa durante loron 20 prizaun, bainhira arguidu la kumpri pena multa refere.

13. Krime ofensa ba integridade física simples ho natureza violénsia doméstika

Nú. Prosesu : 0016/22. BCQLC
Kompozisaun tribunál : Singulár
Juis : Dra. Florencia Freitas
Prokuradór : Dr. Bartolomeu de Araújo
Defeza : Dr. Sidonio Maria Sarmiento
Desizaun : Pena multa US\$45.00

Iha 25 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violénsia doméstika ne'ebé envolve arguidu FPF hasoru nia feen, iha Munisípiu Baukau.

Akuzasaun prokuradór

Prokuradór akuza katak iha 07 Juñu 2022, iha oras tuku 15:00 lokraik, arguidu tuku dala rua iha lezada nia ulun no tuku dala ida iha lezada nia tilun hun. Antes agresaun ne'e arguidu ho lezada diskute malu kona-ba bainhira arguidu atu han maibé lezada la tein etu ida.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu iha akuzasaun no deklarasaun katak akontese ne'e iha banin sira nia uma, agora sira hela fali ona iha arguidu nia inan aman nia uma, depoisde akontese la baku ona lezada, arrepende ona nia hahalok, di'ak malu ona no promete ba tribunál sei la repete ninia hahalok ne'e hasoru lezada ka ema seluk iha futuru, foin primeiravés mai hatan iha tribunál, serbisu nu'udar agrikultór rezultadu hodi sustenta deit ba família.

Alende ne'e, lezada kontinua konfirma faktu hotu iha akuzasaun no konfirma mós ho arguidu nia deklarasaun katak depoisde akontesementu sira di'ak malu kedas no la baku ona lezada to'o agora.

Alegasaun final

Prokuradór konsidera arguidu nia hahalok ne'e provadu tuir faktu sira hotu iha akuzasaun tanba iha produsaun ba prova arguidu rasik konfesa integralmente no lezada konfirma akuzasaun sein rezerva nune'e prokuradór intende katak arguidu provadu komete krime ne'ebé imputa ba nia, razaun hirak ne'e husu ba tribunál atu kondena arguidu ho pena prizaun fulan rua suspende ba tinan ida

Enkuantu defeza husu ba tribunál fó pena ne'ebé kmaan ba arguida ho konsiderasaun sira katak arguidu konfesa faktu hotu iha akuzasaun sein rezerva, arrepende ninia hahalok.

Desizaun

Depoisde avalia faktu hotu, tribunál prova katak arguidu tuku dala rua iha lezada nia ulun no tuku dala ida iha lezada nia tilun hun. Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende nia hahalok, foin primeravés mai hatan iha tribunál, sira moris separa ona nune'e tribunál konklui prosesu ne'e kondena arguidu ho pena multa US\$45.00 ne'ebé kada lora arguidu sei selu 0,50 sentavus durante lora 90. Tribunál mós fiksa pena alternativa durante lora 60 prizaun, bainhira arguidu la kumpri pena multa refere.

14. Krime ofensa ba integridade física simples ho natureza violência doméstica

Nú. Prosesu	: 0021/22. MNMNT
Kompozisaun Tribunál	: Singulár
Juis	: Dra. Florencia Freitas
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento
Desizaun	: Pena multa US\$60.00

Iha 25 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade física simples ho natureza violência doméstica ne'ebé envolve arguidu JS hasoru nia feen, iha Munisípiu Manatuto.

Akuzasaun Prokuradór

Prokuradór akuza katak iha 28 Abril 2022, iha oras tuku 23:45 kalan, arguidu dudu aperta lezada nia kakorok no dudu rabat lezada ba parede rezulta lezada nia kakorok moras no ain parte loos hetan kanek. Antes agresaun ne'e, arguidu ho lezada diskute malu kona-ba arguidu fila serbisu sempre tarde hela de'it ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade física simples ho moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha julgamentu, arguidu konfesa faktu hotu iha akuzasaun no deklara katak arguidu serbisu nu'udar lojistika iha BNCTL kaer mós xave tanba ne'e sempre tarde fila ba uma. Arguidu deklara liután katak arrepende ona ninia hahalok, foin primeiravés mai hatan iha tribunál depoisde akontese sira di'ak malu ona no to'o agora arguidu la baku ona lezada.

Alende ne'e, lezada mós konfirma faktu hotu iha akuzasaun no deklara mós katak depoisde akontesimentu ne'e diak malu ona ho arguidu.

Alegasaun finál

Prokuradór haktuir katak arguidu nia konduta ne'e prenze rekezitu sira husi artigu 145 KP, nune'e mezmu sira di'ak malu ona, maibe nafatin halo prevensaun atu arguidu la repete ninia hahalok hasoru lezada ka ema seluk iha futuru. Nune'e husu ba tribunál atu kondena arguidu ho pena prizaun fulan ida suspende ba tinan ida.

Entretantu, defeza haktuir katak arguidu konfesa faktu hotu iha akuzasaun, diak malu ona, arrepende ona nia hahalok no foin primeiravés mai hatan iha tribunál. Tanba ne'e husu ba tribunál aplika pena ne'ebé kmaan ba arguidu.

Desizaun

Depoide avalia faktu hotu, tribunál prova katak arguidu arguidu dudu aperta lezada nia kakorok no dudu rabat lezada ba parede rezulta lezada nia kakorok moras no ain parte loos hetan kanek.

Bazeia ba faktu provadu sira ne'e no tetu mós ho sirkunstánsia atenuante sira hanesan, arguidu konfesa, arrepende nia hahalok, foin primeravés mai hatan iha tribunál, nune'e tribunál konklui prosesu no kondena arguidu ho pena multa US\$60.00 ne'ebé kada loron arguidu sei selu 0,50 sentavus durante loron 120. Tribunál mós fiksa pena alternativa durante loron 80 prizaun, bainhira arguidu la kumpri pena multa refere.

15. Krime ofensa ba integridade fízika simples ho natureza violénsia doméstika

Nú. Prosesu : 0024/22. MNMNT
Kompozisaun Tribunál : Singulár
Juis : Dra. Florencia Freitas
Prokuradór : Dr. Ambrosio rangel Freitas
Defeza : Dr. Sidonio Maria Sarmiento
Desizaun : Pena multa

Iha 26 Jullu 2022, Tribunál Distrital Baukau prezide Julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu ADRC hasoru nia feen, iha Munisípiu Manatuto.

Akuzasaun prokuradór

Prokuradór akuza katak iha 02 Maiu 2022, iha oras tuku 20.00 kalan, arguidu basa dala ida iha lezada nia matan parte karuk no basa dala ida iha lezada nia kanuruk. Antes agresaun ne'e arguidu ho lezada diskute malu kona-ba atu sosa labarik nia susu ben. Ho nune'e mosu agresaun hirak ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu konfesa faktu hotu ne'ebe imputa ba nia, depoisde akontese sira di'ak malu, foin primeiravés halo agresaun hasoru lezada no to'o agora la baku ona lezada.

Alende ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun katak depoisde akontesementu ne'e arguida la halo ona agresaun hasoru lezada.

Alegasaun finál

Prokuradór haktuir katak mezmu sira di'ak malu ona no moris hamutuk nafatin hanesan feen-la'en, maibé atu prevene arguidu komete tan hahalok ne'e iha futuru hodi labelé hatoman-an uza violénsia hasoru lezada no oan sira, husu ba tribunál atu aplika pena multa ba arguidu.

Enkuantu defeza haktuir katak arguidu konfesa, di'ak malu ona ho lezada, arrepende ona ninia hahalok, foin primeiravés halo agresaun hasoru lezada, ho razaun sira ne'e husu ba tribunál fo pena multa ba arguidu.

Desizaun

Depoisde avalia faktu hotu, tribunál prova katak arguidu basa dala ida iha lezada nia matan parte karuk no basa dala ida iha lezada nia kanuruk.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$45.00, ne'ebé kada loron arguidu sei selu 0,50 Sentavus kada loron durante loron 90. Tribunál mós fiksa pena alternativa durante loron 80 prizaun, bainhira arguidu la kumpri pena multa refere.

16. Krime ofensa ba integridade fízika simples ho natureza violénsia doméstika

Nú. Prosesu	: 0052/22. PDBAU
Kompozisaun Tribunál	: Singulár
Juis	: Dr. José António d. Escurial
Prokuradór	: Dr. Julio da Silva Correia
Defeza	: Dr. Sidonio Maria sarmento
Desizaun	: Pena multa US\$15.00

Iha 26 Jullu 2022, Tribunál Distrital Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 28 Marsu 2022, iha oras tuku 12:00 meiodia, arguidu tolok lezada no lori fatuk tuda dala ida iha lezada nia ain parte karuk. Antes agresaun ne'e,

arguidu ho lezada diskute malu kona-ba lezada husu ajuda ba arguidu atu silu batar, maibé arguidu lakohi, ho nune'e mosu agresaun ne'e.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak iha akontesimentu ne'e arguidu halo hela kantareiru, maibé lezada obriga arguidu atu ba silu batar, nune'e arguidu hirus tolok no tuda fatuk naton ba lezada nia ain parte karuk, depoisde akontesimentu ne'e lezada ba hela iha Uma-Mahon liu lora lima baihira lezada fila husi uma mahon sira diak malu fali no to'o agora arguidu la baka ona lezada, iha oan na'in neen, foin primeiravés halo agresaun hasoru lezada.

Alende ne'e, lezada kontinua konfirma faktu sira iha akuzasaun no konfirma mós ho arguidu nia deklarasaun katak sira di'ak malu ona no to'o agora arguidu la halo ona agresaun hasoru lezada.

Alegasaun finál

Prokuradór haktuir katak mezmua sira di'ak malu ona no moris hamutuk nafatin hanesan feen-la'en, maibé atu halo prevensaun ba arguidu atu la hatoman-an uza violénsia hasoru lezada no oan sira iha futuro, husu ba tribunál atu aplika pena prizaun fulan tolu suspende ba tinan ida.

Entretantu defeza haktuir katak arguidu konfesa faktu hotu iha akuzasaun, di'ak malu ona ho lezada, arrepende ninia hahalok, foin primeiravés halo agresaun hasoru lezada, nune'e husu ba tribunál fó pena ne'ebé kmaan ba arguidu.

Desizaun

Depoisde avalia faktu hotu, tribunál prova katak arguidu tolok lezada no lori fatuk tuda dala ida iha lezada nia ain parte karuk.

Bazeia ba faktu provadu ne'e no tetu mós sirkunstánsia atenuante sira hanesan arguidu konfesa, arrepende ninia hahalok, primeiravés mai hatan iha tribunál no di'ak malu ona ho lezada, nune'e tribunál konklui prosesu ne'e no kondena arguidu ho pena multa US\$ 15.00, ne'ebé arguidu sei selu 0,50 sentavus kada lora durante lora 30. Tribunál mós fiksa pena alternativa durante lora 20 prizaun, bainhira arguidu la kumpri pena multa refere.

17. Krime abuzu seksuál ba menór ho agravasaun

Nú. Prosesu : 0006/22. VQUCB

Kompozisaun Tribunál : Singulár
Juis : Dra. Sribuana da Costa, Dra. Florencia Freitas no Dra. José António d. Escurial
Prokuradór : Dr. Julio da Silva Correia
Defeza : Dr. Sidonio Maria Sarmiento
Desizaun : Pena prizaun tinan 8

Iha 28 Jullu 2022, Tribunál Distrital Baukau prezide julgamentu leitura akordaun ba krime abuzu seksuál ba menór ho agravasaun ne'ebé envolve arguidu HF hasoru lezada ho idade tinan 9, iha Munisípiu Vikeke.

Akuzasaun Prokuradór

Prokuradór akuza katak iha 05 Marsu 2022, lezada hamutuk ho nia avo ba iha nia avo nia alin sira nia uma, iha oras 16:00 lokraik, avo bolu lezada para atu sira fila fali ba sira nia uma, maibé arguidu hateten ba lezada nia avo atu fila uluk ona mak arguidu ho lezada ba tuir, nune'e avo mós fila uluk ona ba uma. Bainhira arguidu ho lezada fila ba liu arguidu nia uma kuandu to'o arguidu nia uma la iha ema mak iha arguidu nia uma, nune'e lezada tuur deit iha varanda hafoin arguidu bolu lezada ba tuur iha uma laran, lezada mós tama ba uma laran hodi tuur iha kadeira leten la kleur arguidu mai tuur iha lezada nia sorin hodi hasai karteira no fó osan ho valor US\$3.00 ba lezada. Depoisde ne'e arguidu kous lezada hodi tuur iha arguidu nia kelen no kolu lezada nia kalsa to'o iha lezada nia ain tuur hafoin arguidu lori liman fuan hodi hatama dala tolu ba iha lezada nia orgaun seksuál, rezulta lezada sofre moras. Bainhira lezada atu hakilar arguidu buti metin lezada niaibun. Derepente lezada nia alin mai bolu lezada atu fila ba uma no arguidu mak hatan katak hamrik iha ne'eba. Ho nune'e lezada atu halai molik deit ba nia uma maibé arguidu dehan ba lezada katak hatais tiha kalsa mak fila ba uma. Bainhira lezada to'o iha uma informa kedas akonteseimentu ne'e ba lezada nia inan.

Prokuradór akuza arguidu kontra artigu 177 (1) KP kona-ba abuzu seksuál ba menór ho moldura penal tinan 5 too tinan 20 prizaun no artigu 182 (a no d) KP kona-ba agravasaun

Produsaun ba prova sira

Iha prosesu julgamentu, arguidu deklara katak hatama liman iha lezada nia kalsa oin no koko atu hatama liman ba lezada nia orgaun seksuál maibe la konsegue, arguidu fó duni osan US\$3.00 ba lezada hanesan família. Arguidu la kolu lezada nia kalsa no la buti lezada nia kakorok. Arguidu deklara liután katak iha akontesimentu ne'e arguidu lanu todan, foin primeiravés mai hatan iha tribuná no arrepende ona ninia hahalok.

Alende ne'e, lezada kontinua konfirma faktu sira iha akuzasaun deklara mós katak bainhira lezada nia alin mai bolu lezada, arguidu sai ba dehan ba nia alin katak hamrik iha ne'eba.

Testemuña HedC nu'udar lezada nia alin depoimenta katak bainhira ba bolu lezada, arguidu mak sai mai hodi dehan ba testemuña hamrik iha ne'eba.

Alegasaun finál

Prokuradór haktuir katak mezmu arguidu konfesa parcialmente ba faktu sira iha akuzasau, maibé lezada konfirma faktu sein rezerva no testemuña mós konfirma faktu balun, prokurador tau krebilidade ba lezada nia deklarasaun no testemuña nia depoimentu. Bazeia ba akuzasaun no produsaun provas arguidu nia aktu ne'e priense rekeztus krime abuzu seksuál ba menór ho agravaasaun. Tanba ne'e husu ba tribunál aplika pena prizaun tinan sanulu ba arguidu.

Enkuantu defeza haktuir katak arguidu konfesa faktu ne'ebé konstitui ba krime ne'e, arrepende ninia hahalok, foin primeiravés mai hatan iha tribunál, nune'e husu ba tribunál fó pena ne'ebé minimu husi krime refere.

Desizaun

Depoisde avalia faktu hotu, tribunál prova katak. arguidu mai tuur iha lezada nia sorin hodi hasai karteira no fó osan ho valor US\$3.00 ba lezada. Depoisde ne'e arguidu kous lezada hodi tuur iha arguidu nia kelen no kolu lezada nia kalsa to'o iha lezada nia ain tuur hafoin arguidu lori liman fuan hodi hatama dala tolu ba iha lezada nia orgaun seksuál, rezulta lezada sofre moras.

Bazeia ba faktu provadu sira ne'e no tetu mós sirkunstánsia atenuante sira hanesan arguidu arrepende nia hahalok, foin primeiravés mai hatan iha tribunál, nune'e tribunál konklui prosesu ne'e no kondena arguidu ho pena prizaun tinan ualu.

18. Krime arma brankas

Nú. Prosesu	: 0018/21. BCQLC
Kompozisaun Tribunál	: Koletivu
Juis	: Dra. Florencia Freitas, Dra. Jumiaty Maria Freitas no Dr. Jose Escurial
Prokuradór	: Dr. Bartolomeu de Araújo
Defeza	: Dr. Sidonio Maria Sarmiento
Desizaun	: Pena prizaun tinan 3 suspende ba tinan 3

Iha 28 Jullu 2022, Tribunál Distrital Baukau prezide Julgamentu leitura akordaun ba krime arma brankas ne'ebé envolve arguidu Agostu Freitas no Mauricio Boavida hasoru Estadu RDTL, iha Suku Lakuliu, Sub-distritu Kelikai, Munisípiu Baukau.

Akuzasaun Prokuradór

Prokuradór akuza katak iha 25 Abril 2021, iha oras tuku 15:00 lokraik, mosu des-intedementu ba malu, arguidu nain rua idak-idak halai ba foti katana no diman hodi

ameasa malu. Motivu husi akontesimentu ne'e arguidu Mauricio fila husi to'os hahan la iha no tolok fali arguidu Agostu nia feen ne'e mosu problema ne'e.

Prokuradór akuza arguidu nain rua kontra artigu 20 (1) husi Lei Arma Brankas.

Produsaun ba prova sira

Iha prosesu julgamentu, arguidu Agostu Freitas konfesa faktu hotu iha akuzasaun no depoisde akontese fila husi eskuadra polisia sira diak malu fali ona, arrepende nia hahalok, foin primeiravés mai hatan iha tribunál. Alende ne'e arguidu Mauricio Boavida mos konfesa faktu hotu iha akuzasaun deklarata katak depoisde akontesimentu ne'e fila husi eskuadra polisia sira diak malu fali ona, arrepende nia hahalok no foin primeiravés mai hatan iha tribunál.

Alegasaun finál

Prokuradór haktuir katak arguidu sira konfesa faktu ne'ebé imputa ba sira, arguidu sira transforma katana no diman ba fali krime bazeia ba akuzasaun no produsaun prova katak arguidu sira provadu komete krime arma brankas, tanba ne'e husu ba tribunál atu kondena arguidu sira ho pena prizaun tinan tolu suspende ba tinan tolu.

Entretantu, defeza akresenta katak iha produsaun ba prova arguidu sira konfesa, arrepende sira nia hahalok, foin primeiravés mai hatan iha tribunál, arguidu sira mós kopera ho justisa hodi la difikulta atu deskobre verdade. Tanba ne'e husu ba tribunál aplika pena ne'ebé kmaan ba arguidu sira.

Desizaun

Depoisde avalia faktu hotu, tribunál prova katak mosu des-intedementu ba malu, arguidu nain rua idak-idak halai ba foti katana no diman hodi ameasa malu.

Bazeia ba faktu provadu sira ne'e no tetu mós sirkunstánsia atenuante sira hanesan arguidu sira konfesa, arrepende ona sira nia hahalok, foin primeiravés mai hatan iha tribunál. Ho nune'e tribunál konklui prosesu ne'e no kondena arguidu sira ho pena prizaun tinan tolu suspende ba tinan tolu.

19. Krime maus-tratus ba kónjuje

Nú. Prosesu	: 0090/21. BCSIC
Kompozisaun Tribunál	: Koletivu
Juis	: Dra. Sribuana da Costa Dra. Florencia Freitas no Dr. José António d. Escurial
Prokuradór	: Dr. Julio da Silva Correia
Defeza	: Dr. Grigorio de Lima
Desizaun	: Pena prizaun tinan 2 suspende ba tinan 2

Iha 29 Jullu 2022, Tribunál Distrital Baukau prezide julgamentu leitura akordaun ba krime maus-tratus ba kónjuje ne'ebé envolve arguidu SJdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 03 Setembru 2021, iha oras tuku 10:30 dadeer, lezada husu osan ba arguidu atu hola fos maibé arguidu la fó no ba fali joga karta no osan lakon, ho nune'e arguidu ho lezada diskute malu arguidu tolok lezada no arguidu hit nia sasan atu sai lezada hateten netik atu labele sai. Ho nune'e arguidu hisik lezada nia liman rezulta lezada monu ba rai kauza lezada nia liman naksalak, alende ne'e lezada nia liman mós kona iha kama rezulta kanek.

Tuir mai iha 24 Marsu 2021, arguidu tuku dala ida iha lezada nia kakorok, tuku dala ida iha lezada nia kanuruk no rasta lezada nia faru hodi riba ba rai. Durente moris hamutuk arguidu sempre halo agresauun hasoru lezada.

Prokuradór akuza arguidu kontra artigu 154 KP kona-ba maus-tratus ba kónjuje ho moldura penál tinan 2 to'o tinan 6, konjuga ho artigu 2, 3(a), 35(a) no 36 LKVD.

Produsaun ba prova sira

Iha prosesu julgamentu, arguidu deklara katak faktu sira ne'ebé akontese iha 03 Setembru no 24 Marsu 2021 loos. Enkuantu kona-ba arguidu sempre baku lezada ne'e laloos. Liután arguidu deklara katak arrepende nia hahalok, primeiravés mai hatan iha tribunál serbisu nu'udar agrikultor rendimentu hodi sustenta deit família.

Iha parte seluk, lezada konfirma faktu hotu iha akuzasaun sein rezerva, depoisde akontese sira diak malu to'o agora arguidu la baku ona lezada.

Alegasaun finál

Prokuradór haktuir katak arguidu provadu halo maltratamentu ba nia kónjuje bazeia ba deklarasaun arguidu nian no konfirma mós husi lezada, nune'e atu prevene arguidu repete tan nia hahalok iha futuru, husu ba tribunál atu aplika pena prizaun tinan rua suspende ba tinan rua.

Entretantu defeza husu ba tribunál atu aplika pena ne'ebé adekuadu ba arguidu ho konsiderasaun sira katak arguidu konfesa faktu sira, diak malu ona ho lezada, arrepende ona nia hahalok, foin primeiravés mai hatan iha tribunál.

Desizaun

Depoisde avalia faktu hotu, tribunál prova katak iha akontesimentu primeiru arguidu hisik lezada nia liman rezulta lezada monu ba rai kauza lezada nia liman naksalak, alende ne'e lezada nia liman mós kona iha kama rezulta kanek. Iha akontesimentu segundu arguidu

tuku dala ida iha lezada nia kakorok, tuku dala ida iha lezada nia kanuruk no rasta lezada nia faru hodi riba ba rai.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, diak malu ona no foin primeiravés mai hatan iha tribunál. Ho nune'e tribunál konklui prosesu ne'e no kondena arguidu ho pena prizaun tinan rua suspende ba tinan rua.

20. Krime ofensa ba integridade fízika simples ho natureza violénsia doméstika

Nú. Prosesu : 0063/22. PDBA
Kompozisaun Tribunál : Singulár
Juis : Dra. Sribuana da Costa
Prokuradór : Dr. João Marques
Defeza : Dr. Grigório Maria Lourdes de Lima
Desizaun : Pena multa US\$45,00

Iha 29 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu AdC hasoru nia feen, iha Munisípiu Baukau.

Akuzasaun Prokuradór

Prokuradór akuza katak iha 29 Abril 2022, iha oras tuku 07:30 dadeer, arguidu tuku dala ida iha lezada nia kabaas parte loos, tebe dala ida iha lezada nia ain-tuur no dudu lezada ba parede. Antes agresaun ne'e, arguidu ho lezada diskute malu kona-ba lezada hetan arguidu nia feen kiik nia roupa iha sira nia armari.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak lezada atu sunu fali nia feen sigundu nia roupa ne'e mak arguidu hirus basa dala ida iha lezada nia kabaas no dudu ba parede, arguidu hola fali ona fetu seluk, arrepende nia hahalo, foin primeiravés mai hatan iha tribunál nu'udar professór ho vensimentu kada fulan US\$372.00.

Iha parte seluk lezada deklara katak hetan feen kiik nia roupa iha sira nia armari ne'e ne'e mak lezada soe sai la'os sunu, ho nune'e sira diskute malu no arguidu halo agresaun hirak ne'e hasoru lezada. Lezada deklara liután katak agora dadaun sira moris separa ona.

Alegasaun finál

Prokuradór haktuir katak arguidu provadu komete krime hasoru lezada no arguidu ninia agresaun ne'e prenze rekezitu sira husi artigu 145 KP, arguidu nia konduta ne'e lezada diside hakarak moris separa ho arguidu. Tetu ba sirkunstánsia sira ne'e, husu ba tribunál atu kondena arguidu ho pena multa.

Entretantu, defeza haktuir katak arguidu konfesa faktu ne'ebé nia komete hasoru lezada hanesan iha akuzasaun, arrepende ninia hahalok, foin primeiravés mai hatan iha tribunál. Tanba ne'e, husu ba tribunál aplika pena ne'ebé adekuadu ba arguidu.

Desizaun

Depoizde avalia faktu hotu, tribunál prova katak arguidu tuku dala ida iha lezada nia kabaas parte loos, tebe dala ida iha lezada nia ain tuur no dudu lezada ba parede.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, foin primeiravés mai hatan iha tribunál. nune'e tribunál konklui prosesu ne'e no kondena arguidu ho pena multa US\$45.00 ne'ebé arguidu sei selu 0,50 sentavus kada loron durante loron 90. Tribunál mós fiksa pena alternativa durante loron 60 prizaun, bainhira arguidu la kumpri pena multa refere.

21. Krime ofensa ba integridade fízika simples ho natureza violénsia doméstika

Nú. Prosesu : 0080/21. LASIC
Kompozisaun Tribunál : Singulár
Juis : Dra. Sribuana da Costa
Prokuradór : Dr. João Marques
Defeza : Dr. Grigório Maria Lourdes de Lima
Desizaun : Pena prizaun fulan 1 suspende ba tinan 1

Iha 29 Jullu 2022, Tribunál Distritál Baukau prezide julgamentu leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu JdC hasoru nia feen, iha Munisípiu Lautem.

Akuzasaun Prokuradór

Prokuradór akuza katak iha 15 Novembru 2021, iha oras tuku 09:30 dadeer, arguidu tebe dala ida iha lezada nia hirus matan parte karuk. Antes agresaun ne'e, arguidu ho lezada diskute malu kona-ba arguidu atu sobu tiha sira nia kioske, tanba lezada lakohi entrega kareta nia dokumentu ba arguidu.

Prokuradór akuza arguidu kontra artigu 145 KP kona-ba ofensa ba integridade fízika simples ho nia moldura penál to'o tinan 3 ka multa konjuga ho artigu 2, 3(a), 35(b) no 36 LKVD.

Produsaun ba prova sira

Iha prosesu julgamentu, arguidu deklara katak faktu ne'ebé imputa ba arguidu ne'e loos hotu, arrepende ninia hahalok, promete sei la baku tan lezada iha futuru, foin primeiravés mai hatan iha tribunál no arguidu nu'udar agrikultor rezultadu hodi sustenta deit ba família

Alende ne'e, lezada mós kontinua konfirma faktu sira iha akuzasaun no deklara katak depoisde akontese sira di'ak malu kedas no to'o agora arguidu la baku ona lezadu.

Alegasaun finál

Prokuradór haktuir katak akuzasaun ne'ebé imputa ba arguidu ne'e provadu hotu bazeia ba arguidu nia deklarasaun no konfirma mós husi lezada, tanba ne'e husu ba tribunál atu kondena arguidu ho ba pena multa.

Entretantu defeza husu ba tribunál atu kondena arguidu ho pena ne'ebé adekuadu ho konsiderasaun sira katak, arguidu konfesa, arrepende nia hahalok no foin primeiravés mai hatan iha tribunál no kooperera di'ak ho justisa.

Desizaun

Depoisde avalia faktu hotu, tribunál prova katak arguidu tebe dala ida iha lezada nia hirus matan parte karuk.

Bazeia ba faktu provadu sira ne'e no tetu mós sirkunstánsia atenuante sira hanesan arguidu konfesa, arrepende ninia hahalok, di'ak malu ona ho lezada no foin primeiravés mai hatan iha tribunál. Ho nune'e tribunál konklui prosesu ne'e no kondena arguidu ho pena ho pena prizaun fulan ida suspende ba tinan ida.

Atu hetan informasaun liutan favór kontaktu:

Ana Paula Marçal
Diretora Ezekutiva JSMP
Telefone: 3323883/77040735
Diresaun e-mail: ana@jsmp.tl
info@jsmp.tl
Website: <http://jsmp.tl>

